

04/05/1999

Tipu helah pembangkang melucukan

Anti Reformasi

SESUNGGUHNYA kegawatan ekonomi yang melanda negara, kekusutan politik semasa ditambah kebimbangan masyarakat terhadap fenomena penyakit terbaru yang ditemui amat merumitkan kerajaan untuk menanganinya hampir serentak.

Walaupun senario yang melanda, saya sebagai rakyat Malaysia yang dilahirkan selepas merdeka berasa amat bersyukur dan redha terhadap segala ujian dari yang berkuasa. Sekalung tahniah kepada kepemimpinan Perdana Menteri, Datuk Seri Dr Mahathir Mohamad, serta barisan Kabinet yang setakat ini cemerlang menangani apa jua pancaroba.

Bahang pilihan raya yang semakin hampir semakin hangat, lantaran menimbulkan kecenderungan pihak pembangkang mempolitikkan isu semasa untuk meraih simpati rakyat. Justeru mereka tanpa segan silu memperkatakan apa saja, menghebahkan segala jenis dusta dalam apa jua cara demi merealisasikan cita-cita politik walaupun rata-rata penceramah semuanya yang bergelar ulama, ustaz setidaknya pun seorang haji.

Tidak dapat dinafikan kerajaan yang baik memerlukan barisan pembangkang yang juga baik serta ikhlas demi perpaduan rakyat, kemajuan ekonomi serta kestabilan politik. Tetapi helah parti pembangkang amatlah dikesalkan dan kadang-kadang melucu serta memalukan. Sesetengah mereka ini sebenarnya adalah kakitangan kerajaan atau badan berkanun lain yang setiap akhir bulan mendapat gaji menyara keluarga dan pada masa sama melaung-laungkan api reformasi. Saya ingin mencabar mereka agar meletakkan jawatan dan tidak lagi terus mengharap wang kerajaan sekiranya benar-benar yakin akan perjuangan mereka.

Saya terus berpendapat yang pihak polis yang akhir-akhir ini dilabelkan sebagai pencetus keganasan sebenarnya adalah yang terbaik dan menjalankan tugas dengan penuh kesabaran serta dedikasi yang amat tinggi walaupun sering dilihat di kaca televisyen mereka dicuci, dimaki serta sesetengahnya tercedera. Saya tidak dapat membayangkan kemungkinan yang lebih buruk sekiranya anggota polis ini bertindak seperti polis antirusuhan di negara-negara lain di dunia dan jika ini terjadi, sebenarnya adalah satu bonus kepada media asing untuk terus memperbesarkan isu dan untuk jangka panjang amat merugikan negara.

Jadilah seorang warganegara yang bertanggungjawab dan renunglah peribahasa lama yang sebenarnya amat besar pengertiannya. "Janganlah hanya menang sorak kampung tergadai dan maruah tercemar selamanya."